



Communicaziun a las medias

Impuls litterars «live» da Savognin

Cuira, ils 28-05-2018 – «Sin il viv!» è la turnea da lecturas per festivar il giubileum da 25 onns da l'emissiun *Impuls* da Radiotelevision Svizra Rumantscha (RTR). Di per di, dapi l'onn 1993, emetta RTR en l'emissiun *Impuls*, in patratg per cumenzar il di. Istorgias vairas u bain inventadas. Dumengia, ils 3 da zercladur a las 16:30, sa ferma la turnea litterara tar la Lainaria Uffer SA a Savognin. Là prelegian las auturas Rina Steier, Dominique Dosch e Zegna Pittet-Dosch e l'autur Göri Klainguti lur *Impuls*.

La pli giuvna autura da quest quartet è Dominique Dosch da Tinizong. Gia cun 18 ha ella pudì publitgar ses emprim cudesch «Sindoria», in roman da fantasia, tar la Chasa Editura Rumantscha. Dapi lura ha ella publitgà surtut prosa curta ch'ella scriva era per ils *Impuls* cun bler entusiassem e gust d'experimentar. Dapi in onn fa la scolasta e schurnalista Zegna Pittet-Dosch da Cunter, ils emprims pass litterars en publicitad scrivend *Impuls*. Ses *Impuls* raquintan cun blera autoironia istorgias persunalas che tematiseschan co che l'atgna percepziun sa mida culs onns ed en passond era co che la regiun dal Surmeir è sa midada.

Gia dapi il 1998 pon ins udir texts da Rina Steier al Radio Rumantsch. L'autura da Savognin è stada engaschada en divers uffizis politics, tranter auter era sco deputada en il Cussegl grond. La promoziun da dunnas è adina stada impurtanta per Rina Steier ed uschia er adina puspè in tema en ses *Impuls*. Anc pli ditg che Rina Steier, numnadamain dapi l'entschatta da l'emissiun l'onn 1993, scriva il Puter Göri Klainguti per ils *Impuls*. El ha publitgà divers cudeschs e texts en gasettas, revistas ed antologias, uschia era per la gasettina «Il chardun». Ses texts èn raffinads e tschegnan adina cun umur sin pitschnas e grondas absurditads da nossa lingua e da noss mintgadi.

En la halla da construcziun da la Lainaria Uffer SA vegnan las trais auturas e l'autur a preleger vegls, ma era novischems *Impuls*, scrits aposta per il «Sin il viv!» a Savognin, che tractan tranter auter dal temp, d'aissas e da l'ir or per la roma.

Passa 9'000 *Impuls* durant ils ultims 25 onns

Di per di, dapi l'onn 1993, emetta RTR en l'emissiun *Impuls*, in patratg per cumenzar il di da las audturas e dals auditurs da radio. Istorgias vairas u bain inventadas. Texts alleghers, poetics, trists, experimentals, meditativs, critics e savens cun ina nota persunala. Cun ils onns èn ils *Impuls* quasi daventads in agen gener litterar rumantsch, e la rubrica ha survegnì ina impurtanta muntada en la promoziun da la litteratura rumantscha. Durant ils ultims 25 onns èn vegnids scrits, legids ed emess passa 9'000 *Impuls*.

La quarta lectura da «Sin il viv!» ha lieu dumengia, ils 29 da fanadur 2018 a las 16:30 en l'iert da la Chasa Torel a Guarda. Là legian Rut Plouda, Plinio Meyer, Fadrina Hoffmann ed Arnold Spescha *Impuls* che raquintan da turists ed d'auter zerclim. La turnea è publica, l'entrada libra.

Dapli infurmaziuns

RTR | Madlaina Niggli | referendaria comunicaziun e marketing | tel. 081 255 74 34 | madlaina.niggli@rtr.ch